

七十二家集

馮曲陽集引

才情如敬通何注不得自
奮於功名況其在風雲之
際乎縱垂拊翼以橫飛詎
意其沉淪以老真若堂簑
之不御也夫其効忠更始

歸命稍遲正是半生義槩
不比世人之逐流赴沫者
帝何望之深哉毋亦喜事
而近迂抗顏而顛激拙於
用大故終成剖瓠之樽耶
通士合五侯之鯖而敬通

翻以候門坐累介士携鹿
門之隱而敬通翻以閨閣
絨愁如曳碎繒觸地呈硤
天實為之非智巧所得參
也敬通始末按籍可覆君
子哀屯暮之窮焉身雖晦

而志乃竟顯矣

乙丑夏五日紹和張燮書
於幔亭峯麓



馮曲陽集目錄

卷之一

賦

顯志賦

疏

自陳疏

奏記

奏記鄧禹

牋

與鄧禹牋

卷之二

書

與田邑書

田邑報馮衍書附

說鄧禹書

與鄧禹書

與陰就書

出獄後與陰就書

與婦弟任武達書

與宣孟書

論

自論

銘

刀陽銘

刀陰銘

杖銘

杯銘

車銘

附錄

馮衍傳

宋范曄

恨賦畧

梁江淹

自序

比馮敬通

梁劉峻

集評

馮曲陽集卷之一

漢京兆馮衍敬通著

明閩漳張熒紹和纂

賦

顯志賦

開歲發春兮百卉含英
甲子之朝兮汨吾西征
發軔新豐兮裴回鎬京
陵飛廉而太息兮登平
陽而懷傷悲時俗之險
阨兮哀好惡之無常棄
衡石而意量兮隨風波
而飛揚紛綸流於權利

兮親雷同而妒異獨耿介而慕古今豈時人之
所憚沮先聖之成論兮邇名賢之高風忽道德
之珍麗兮務富貴之樂耽遵大路而裴回兮履
孔德之窈冥固衆夫之所眩兮孰能觀於無形
行勁直以離尤兮羌前人之所有內自省而不
慙兮遂定志而弗改欣吾黨之唐虞兮愍吾生
之愁勤聊發憤而揚情兮將以蕩夫憂心往者
不可攀援兮來者不可與期病沒世之不稱兮
願橫逝而無由陟雍時而消搖兮超略陽而不

反念人生之不再兮悲六親之日遠陟九嶷而
臨裴薛兮聽涇渭之波聲顧鴻門而歔歔兮哀
吾孤之早零何天命之不純兮信吾罪之所生
傷誠善之無辜兮齋此恨而入冥嗟我思之不
遠兮豈敗事之可悔雖九死而不眠兮恐餘殃
之有再淚沈瀾而雨集兮氣滂沱而雲披心拂
鬱而紆結兮意沈抑而內悲瞰太行之嵯峨兮
觀壺口之崢嶸悼丘墓之蕪穢兮恨昭穆之不
榮歲忽忽而日邁兮壽冉冉其不與恥功業之

無成兮赴原野而窮處昔伊尹之干湯兮七十
說而乃信臯陶釣於雷澤兮賴虞舜而後親無
二士之遭遇兮抱忠貞而莫達率妻子而耕耘
兮委厥美而不伐韓盧抑而不縱兮騏驥絆而
不試獨慷慨而遠覽兮非庸庸之所識卑衛賜
之阜貨兮高顏回之所慕重祖考之洪烈兮故
收功於此路循四時之代謝兮分五土之刑德
相林麓之所產兮嘗水泉之所殖修神農之本
業兮採軒轅之奇策追周棄之遺教兮軼范蠡

之絕迹陟隴山以踰望兮眇然覽於八荒風波
飄其並興兮情惻悵而增傷覽河華之決漭兮
望秦晉之故國憤馮亭之不遂兮慍去疾之遭
惑流山岳而周覽兮徇碣石與洞庭浮江河而
入海兮泝淮濟而上征瞻燕齊之舊居兮歷宋
楚之名都哀羣后之不祀兮痛列國之爲墟馳
中夏而升降兮路紆軫而多艱講聖哲之通論
兮心惛憶而紛紜惟天路之同軌兮或帝王之
異政堯舜煥其蕩蕩兮禹承平而革命并日夜

而幽思兮終怵憚而洞疑高陽懸其超遠兮世
孰可與論茲訊夏啓於甘澤兮傷帝興之始傾
頌成康之載德兮詠南風之歌聲思唐虞之晏
晏兮揖稷契與爲朋苗裔紛其條暢兮至湯武
而勃興昔三后之純粹兮每季世而窮禍弔夏
桀於南巢兮哭殷紂於牧野詔伊尹於亳郊兮
享呂望於鄴洲功與日月齊光兮名與三王爭
流楊朱號乎衢路兮墨子泣乎白絲知漸染之
易性兮怨造作之弗思美關雎之識微兮愍王

道之將崩拔周唐之盛德兮招桓文之譎功忿
戰國之遭禍兮憎權臣之擅彊黜楚子於南郢
兮執趙武於渙梁善忠信之救時兮惡詐謀之
妄作聘申叔於陳蔡兮禽荀息於虞虢誅犁鋤
之介聖兮討臧倉之慝知娛子反於彭城兮爵
管仲於夷儀疾兵革之寢滋兮苦攻伐之萌生
沈孫武於五湖兮斬白起於長平惡叢巧之亂
世兮毒縱橫之敗俗流蘇秦於洹水兮幽張儀
於鬼谷澄德化之陵遲兮烈刑罰之峭峻燔商

鞅之法術兮燒韓非之說論
誚始皇之跋扈兮投李斯於四裔
滅先王之法則兮禍寢淫而弘
大援前聖以制中兮矯二主之驕奢
僖女齊於絳臺兮饗椒舉於章華
摘道德之光耀兮匡衰世之耿風
襃宋襄於泓谷兮表季札於延陵
撫仁智之英華兮激亂國之末流
觀鄭僑於溱洧兮訪晏嬰於營丘
日噓噓其將暮兮獨於邑而煩惑
夫何九州之博大兮迷不知路之
南北駟素蚪而馳騁兮乘翠雲而
相伴就伯夷而折中

今得務光而愈明歟子高於中野兮遇伯成而
定慮欽真人之德美兮淹躊躇而弗去意斟懽
而不澹兮俟回風而容與求善卷之所存兮遇
許由於負黍朝吾車於箕陽兮秣吾馬於潁潁
聞至言而曉領兮還吾反乎故宇覽天地之幽
奧兮統萬物之維綱究陰陽之變化兮昭五德
之精光躍青龍於滄海兮泰白虎於金山鑿巖
石而爲室兮託高陽以養仙神崔翔於鴻崖兮
玄武潛於嬰冥伏朱樓而四望兮採三秀之華

英纂前修之夸節兮曜往昔之光勳披綺季之
麗服兮揚屈原之靈芬高吾冠之岌岌兮長吾
佩之洋洋飲六醴之清液兮食五芝之茂英捷
六枳而爲籬兮築蕙若而爲室播蘭芷於中廷
兮列杜衡於外術攢射干雜靡蕪兮搆木蘭與
辛夷光扈扈而煬燿兮紛郁郁而暢美華芳羣
其發越兮時恍惚而莫貴非借身之埒軻兮憐
衆美之樵悴游精神於大宅兮抗玄妙之常操
處清靜以養志兮實吾心之所樂山峨峨而造

天兮林冥冥而暢茂鸞回翔索其羣兮鹿哀鳴
而求其友讎古今以散思兮覽聖賢以自鎮嘉
孔丘之知命兮大老聃之貴玄德與道其孰寶
兮名與身其孰親陂山谷而間處兮守寂寞而
存神夫莊周之釣魚兮辭卿相之顯位於陵子
之灌園兮似至人之髣髴蓋隱約而得道兮羌
窮悟而入術離塵垢之窈冥兮配喬松之妙節
惟吾志之所庶兮固與俗其不同旣傲儻而高
引兮願觀其從容

疏

自陳疏

臣伏念高祖之略而陳平之謀毀之則疏譽之則親以文帝之明而魏尚之忠繩之以法則爲罪施之以德則爲功逮至晚世董仲舒言道德見妬於公孫弘李廣奮節於匈奴見排於衛青此忠臣之常所爲流涕也臣衍自惟微賤之臣上無無知之薦下無馮唐之說乏董生之才寡李廣之勢而欲免讒口濟怨嫌豈不難哉臣衍

之先祖以忠貞之故成私門之禍而臣衍復遭
機穽之時值兵革之際不敢回行求時之利事
君無傾邪之謀將帥無虜掠之心衛尉陰興敬
慎周密內自修勅外遠嫌疑故敢與交通興知
臣之貧數欲本業之臣自惟無三益之才不敢
處三損之地固讓而不受之昔在更始太原執
貨財之柄居倉卒之間據位食祿二十餘年而
財產歲狹居處日貧家無布帛之積出無輿馬
之飾於今遭清明之時飭躬力行之秋而怨讎

叢興譏議橫世蓋富貴易爲善貧賤難爲工也
疏遠寵畝之臣無望高闕之下惶恐自陳以救
罪尤

奏記

奏記鄧禹

衍聞明君不惡切慤之言以測幽冥之論忠臣
不顧爭引之患以達萬機之變是故君臣兩興
功名兼立銘勒金石令問不忘今衍幸逢寬明
之日將值危言之時豈敢拱默避臯而不竭其
誠哉伏願天下離王莽之害久矣始自東郡之
師繼以西海之役巴蜀沒於南夷緣邊破於北
狄遠征萬里暴兵累年禍罕未解兵連不息刑

法彌深賦歛愈重衆彊之黨橫擊於外百僚之
臣貪殘於內元元無聊饑寒竝臻父子流亾夫
婦離散廬落丘墟田疇蕪穢疾疫大興災異蠭
起於是江湖之上海岱之濱風騰波湧更相駘
藉四垂之人肝腦塗地死亾之數不啻太半殃
咎之毒痛入骨髓匹夫僮婦咸懷怨怒皇帝以
聖德靈威龍興鳳舉率宛葉之衆將散亂之兵
噴血昆陽長驅武關破百萬之陳摧九尾之軍
雷震四海席卷天下攘除禍亂誅滅無道一基

之間海內大定繼高祖之休烈脩文武之絕業
社稷復存炎精更輝德冠往初功無與二天下
自以去亾新就聖漢當蒙其福而賴其願樹恩
布德易以周洽其猶順驚風而蜚鴻毛也然而
諸將虜掠逆倫絕理殺人父子妻人婦女燔其
室屋略其財產饑者毛食寒者裸跣寃結失望
無所歸命今大將軍以明淑之德秉大使之權
統三軍之政存撫并州之人惠愛之誠加乎百
姓高世之聲聞乎羣士故其延頸企踵而望者

非特一人也且大將軍之事豈得珪璧其行束脩其心而已哉將定國家之大業成天地之元功也昔周宣中興之主齊桓霸彊之君耳猶有申伯召虎夷吾吉甫攘其蝥賊安其彊宇況乎萬里之漢明帝復興而大將軍爲之梁棟此誠不可以忽也且祈聞之兵久則力屈人愁則變生今邯鄲之賊未滅真定之際復擾而大將軍所部不過百里守城不休戰軍不息兵革雲翔百姓震駭柰何自怠不爲深憂夫并州之地東

帝名關北逼彊胡年穀獨熟人庶多資斯四戰
之地攻守之場也如其不虞何以待之故曰德
不累積人不爲用備不豫具難以應卒今生人
之命縣於將軍將軍所杖必須良才宐改易非
任更選賢能夫十室之邑必有忠信審得其人
以承大將軍之明則雖山澤之人無不感德思
樂爲用矣然後簡精銳之卒發屯守之士三軍
旣整甲兵已具相其土地之饒觀其水泉之利
制屯田之術習戰射之教則威風遠暢人安其

業矣若鎮太原撫上黨收百姓之歡心樹名賢之良佐天下無變則足以顯聲譽一朝有事則可以建大功惟大將軍開日月之明發深淵之慮監六經之論觀孫吳之策省羣議之是非詳衆士之白黑以超周南之迹垂甘棠之風令夫功烈施於千載富貴傳于無窮伊望之策何以

加茲

按此出東觀漢記者後漢書馮衍傳作說鮑永謂更始遣鮑永安集北方衍因說永

云云唐章懷太子于漢書註引東觀記衍更始時爲偏將軍與鮑永相善更始既敗建武初爲揚化大將軍掾辟鄧禹府數奏記於禹陳政言事自明君以下皆是諫鄧禹之詞非勸鮑永之說

不知何據有此乖違然東觀記
去仿未遠必非無因聊存集中

牋

與鄧禹牋

今日裘與蓑孰急見雨則裘不用上堂則蓑不
御此更爲適者也今敬通逢堂蓑之不御也

馮曲陽集卷之二

漢京兆馮衍敬通著

明閩漳張燮紹和纂

書

輿田邑書

蓋聞晉文出奔而子犯宣其忠趙武逢難而程
嬰明其賢二子之義當矣今三王背畔赤眉危
國天下螳動社稷顛隕是忠臣立功之日志士
馳馬之秋也伯玉擢選剖符專宰大郡夫上黨

之地有四塞之固東帶三關西爲國蔽柰何舉之以資彊敵開天下之匈假仇讎之刃豈不哀哉衍聞之委質爲臣無有二心挈瓶之智守不假器是以晏嬰臨盟擬以曲戟不易其辭謝息守郿脅以晉魯不喪其邑由是言之內無鉤頸之禍外無桃萊之利而被畔人之聲蒙降城之恥竊爲左右羞之且邾庶其竊邑畔君以要大利曰賤而必書莒牟夷以土地求食而名不滅是以大丈夫動則思禮行則思義未有背此而

身名能全者也爲伯玉深計莫若與鮑尚書同
情戮力顯忠貞之節立超世之功如以尊親係
累之故能捐位投命歸之尚書大義旣全敵人
紆怨上不損剖符之責下足救老幼之命申眉
高談無媿天下若乃貪上黨之權惜全邦之實
竹恐伯玉必懷周趙之憂上黨復有前年之禍
昔晏平仲納延陵之誨終免欒高之難孫林父
違穆子之戒故陷終身之惡以爲伯玉聞此至
言必若刺心自非嬰城而堅守則策馬而不顧

也聖人轉禍而爲福智士因敗以成勝願自強
于時無與俗同

又太平御覽云今以一節之任
建三軍之威豈得寵其八尺之

竹籠牛
之尾也

田邑報馮衍書附

僕雖駑怯亦欲爲人者也豈苟貪生而畏死
哉曲戟在頸不易其心誠僕志也間者老母
諸弟見執于軍而邑安然不顧者豈非重其
節乎若使人居天地壽如金石要長生而避
死地可也今百齡之期未有能至老壯之間

相去幾何誠使故朝尚在忠義可立雖老親
受戮妻兒橫分邑之願也間者上黨黠賊大
衆圍城義兵兩輩入據井陘邑親潰敵圍拒
擊宗正自試智勇非不能當誠知故朝爲兵
所害新帝司徒已定三輔隴西北地從風響
應其事昭昭日月經天河海帶地不足以比
死生有命富貴在天天下存亡誠云命也邑
雖沒身能如命何人道之本有恩有義義有
所宐恩有所施君臣大義母子至恩今故主

已亡義其誰爲老母拘執恩所當留而厲以
貪權誘以策馬抑其利心必其不顧何其愚
乎邑年三十歷位卿士性少嗜慾情厭事爲
況今位尊身危財多命殆鄙人知之何疑君
子君長敬通揭節垂組自相署立蓋仲由使
門人爲臣孔子譏其欺天君長據位兩州加
以一郡而河東畔國兵不入莒上黨見圍不
窺大谷宗正臨境莫之能援兵威屈辱國權
日損三王背畔赤睂害主未見兼行倍道之

赴昔墨翟累繭救宋申包胥重胝存楚衛女
馳歸唁兄之志主亾一歲莫知定所處冀妄
言苟肆鄙塞未能事生安能事死未知爲臣
焉知爲主豈厭爲臣子思爲君父乎欲播太
山而蕩北海事敗身危要思邑言

說鄧禹書

衍聞昔者先王學大道以觀於政夫爲君而不
明於道上無所承天下無以化民爲臣而不明
於道進無以事君退無以修身聖朝天然之資
將軍純茂之德誠少游神乎經書之林馳情乎
玄妙之中明照於日月而智溢於四海聖朝享
堯舜之榮將軍荷稷契之烈自然理也

與鄧禹書

衍以爲寫神輸意則聊城之說碧雞之辯不足

難也

又太平御覽載馮書云大虎豹愛大林蛟龍愛大水

與陰就書

衍聞神龍驤首幽雲景蒸明聖修德志士思名
是以意同情合聲比則應也伏見君侯忠孝之
性慈仁殷勤論議周密思慮深遠顧以微賤數
蒙聖恩被侯大惠衍年老被病恐一旦無祿命
先犬馬懷抱不報齎恨入冥思剖肝膽有以塞
責方今天下安定四海咸服蒙恩更生之臣無
所效其死力側聞東平山陽王壯當之國擇除
官屬衍不自量願侯白以衍備門衛鄙語曰水

不激不能破舟矢不激不能飲羽不念舊惡名
賢所高負責之臣欲言不敢惟侯哀憐深留聖
心則闔棺之日魂復何恨

出獄後與陰就書

朽材素愚驚行義汗穢外無鄉里之譽內無汗
馬之勞猥蒙明府天覆之德華寵重疊間者掾
史疑朽之罪衆熙飄山當爲灰土賴蒙明察揆
其素行復保首領倍知厚德篤於慈父浸淫肌
膚滲漉骨髓德重山嶽澤深河海前送妻子還
淄縣遭雨逢暑以七月還至陽武聞詔捕諸王
賓客惶怖詣闕冀先事自歸十一日到十二日
書報歸田里卽日束手詣洛陽詔獄十五日夜

詔書勿問得出遭雨又疾大困冀高世之德施
以田子老馬之惠贈以秦穆駿馬之恩使長有
依歸以效忠心

與婦弟任武達書

天地之性人有喜怒夫婦之道義有離合先聖之禮士有妻妾雖宗之眇微尚欲踰制年衰歲暮恨入黃泉遭遇嫉妬家道崩壞五子之母足尚在門五年已來日甚歲劇以白爲黑以非爲是造作端末妄生首尾無罪無辜讒口嗷嗷亂匪降天生自嬖人青蠅之心不重破國嫉妬之情不憚喪身牝雞之晨維家之索古之大患今始於沴醉飽過差輒爲桀紂房中調戲布散海

外張目抵掌以有爲無痛徹蒼天毒流五臟愁
令人不賴生忿令人不顧禍入門著牀繼嗣不
育紡績織紵了無女工家貧無僮賤爲匹夫故
舊見之莫不悽愴曾無憫惜之恩惟一婢武達
所見頭無釵珥而無脂澤形骸不蔽手足抱土
不原其窮不揆其情跳梁大叫呼若入冥販糖
之妾不忍其態計婦當去久矣念兒曹小家無
宅使哀憐姜豹常爲奴婢惻惻焦心事事腐腸
訥訥籍籍不可聽聞暴虐此婢不死如髮半年

之間膿血橫流婢病之後姜竟春炊豹又鴈歸
泥塗心爲愴然緋縠放散冬衣不補端坐化亂
一縷不貫旣無婦道又無母儀忿見侵犯恨見
狼藉依倚鄭令如居天上持質相劫詞語百車
劍戟在門何暇有讓百弩環舍何可彊復舉宗
達人解說詞如循環口如布穀縣幘竟天擊鼓
動地心不爲惡身不爲播耳宏詳居錯且自爲
計無以上書告訴相恐狗吠不驚自信其情不
去此婦則家不寧不去此婦則家不清不去此

婦則福不生不去此婦則身不榮不去此婦則
事不成吾數奇命薄端相逢遭自恨以華盛時
不早自定至於垂白家貧身賤之日養癰長疽
自生禍殃衍以室家紛然之故損棄衣冠側身
山野絕交游之路杜仕宦之門闔門不出心專
耕耘以求衣食何敢有功名之路哉

與宣孟書

居室之義人之大倫思厚歡和之節樂定金石
之固又自傷前遭不良此有去兩頰之名事誠
不得不然豈中心之所好哉

論

自論

馮子以爲大人之德不碌碌如玉落落如石風
興雲蒸一龍一蛇與道翱翔與時變化夫豈守
一節哉用之則行舍之則藏進退無主屈伸無
常故曰有法無法因時爲業有度無度與物趣
舍常務道德之實而不求當世之名濶畧杪小
之禮蕩佚人間之事正身直行恬然肆志顧嘗
好倣儻之策時莫能聽用其謀喟然長歎自傷

不遭久棲遲於小官不得舒其所懷抑心折節
意悽情悲夫伐冰之家不利雞豚之息委積之
臣不操市井之利況歷位食祿二十餘年而財
產益狹居處益貧惟夫君子之仕行其道也愿
時務者不能與其德爲身求者不能成其功去
而歸家復羈旅於州郡身愈據職家彌窮困卒
離饑寒之災有喪元子之禍先將軍葬渭陵哀
帝之崩也營之以爲園於是以新豐之東鴻門
之上壽安之中地執高敞四通廣大南望鄠山

北屬涇渭東瞰河華龍門之陽三晉之路西顧
鄠鄠周秦之丘宮觀之墟通視千里覽見舊都
遂定塋焉退而幽居蓋忠臣過故墟而歔歔孝
子入舊室而哀歎每念祖考著盛德於前垂鴻
烈於後遭時之禍墳墓蕪穢春秋蒸嘗昭穆無
列年衰歲暮悼無成功將西田牧肥饒之野殖
生產脩孝道營宗廟廣祭祀然後闔門誨習道
德觀覽乎孔老之論庶幾乎松喬之福上隴阪
陟高岡游精宇宙流目八紘歷觀九州山川之

體追覽上古得失之風愍道陵遲傷德分崩夫
覩其終必原其始故存其人而詠其道疆理九
野經營五山眇然有思陵雲之意乃自賦白厲
命其篇曰顯志顯志者言光明風化之情昭章
玄妙之思也

銘

刀陽銘

脩爾甲兵用戒不虞見危授命臨事而懼

刀陰銘

溫溫穆穆配天之威苗裔無疆福祿來綏

杖銘

杖莫如信行莫如仁惠而無實怨及爾身趙武
之珍子罕之寶二子之迹蓋近於道

杯銘

樂則思舊燕則思懼民之失德乾候以愆

車銘

乘車必護輪治國必愛民車無輪安處國無民
誰與

附錄

馮衍傳

宋范曄

馮衍字敬通京兆杜陵人也祖野王元帝時爲大鴻臚衍幼有奇才年九歲能誦詩至二十而博通羣書王莽時諸公多薦舉之者衍辭不肯仕時天下兵起莽遣更始將軍廉丹討伐山東丹辟衍爲掾與俱至定陶莽追詔丹曰倉廩盡矣府庫空矣可以怒矣可以戰矣將軍受國重任不捐身於中野無以報恩塞責丹惶恐夜召

衍以書示之衍因說丹曰衍聞順而成者道之所大也逆而功者權之所貴也是故期於有成不問所由論於大體不守小節昔逢尹父伏軾而使其君取飲稱於諸侯鄭祭仲立突而出忽終得復位美於春秋蓋以死易生以存易亡君子之道也詭於衆意寧國存身賢智之慮也故易曰窮則變變則通通則久是以自天祐之吉无不利若夫知其不可而必行之破軍殘衆無補於主身死之日負義於時智者不爲勇者不

行且循聞之得時無怠張良以五世相韓椎秦
始皇博浪之中勇冠乎資育名高乎泰山將軍
之先爲漢信臣新室之興英俊不附今海內潰
亂人懷漢德甚於詩人思召公也愛其甘棠而
況子係乎人所歌舞天必從之方今爲將軍計
莫若屯據大郡鎮撫吏士砥礪其節百里之內
牛酒日賜納雄傑之士詢忠智之謀要將來之
心待從橫之變興社稷之利除萬人之害則福
祿流於無窮功烈著於不滅何與軍覆於中原

身膏於草野功敗名喪恥及先祖哉聖人轉禍而爲福智士因敗而爲功願明公深計而無與俗同丹不能從進入睢陽復說丹曰蓋聞明者見於無形智者慮於未萌況其昭哲者乎凡患生於所忽禍發於細微敗不可悔時不可失公孫鞅曰有高人之行負非於世有獨見之慮見贅於人故信庸庸之論破金石之策襲當世之操失高明之德夫決者智之君也疑者事之役也時不重至公勿再計丹不聽遂進及無鹽與

赤眉戰死衍乃亡命河東更始二年遣尚書僕射鮑永行大將軍事安集北方衍因以計說永永既素重衍爲且受使得自置偏裨乃以衍爲立漢將軍領狼孟長屯太原與上黨太守田邑等繕甲養士扞衛井土及世祖卽位遣宗正劉延攻天井關與田邑連戰十餘合延不得進邑迎母弟妻子爲延所獲後邑聞更始敗乃遣使詣洛陽獻璧馬卽拜爲上黨太守因遣使者招永衍永衍等疑不肯降而忿邑背前約衍乃遣

邑書邑報之衍不從或訛言更始隨赤眉在北
永衍信之故屯兵界休方移書上黨云皇帝在
雍以惑百姓永遣弟升及子壻張舒誘降涅城
舒家在上黨邑悉繫之又書勸永降永不答自
是與邑有隙邑字伯玉馮翊人也後爲漁陽太
守永衍審知更始已歿乃共罷兵幅巾降於河
內帝怨衍等不時至永以立功得贖罪遂任用
之而衍獨見黜永謂衍曰昔高祖賞季布之罪
誅丁固之功今遭明主亦何憂哉衍日記有之

人有挑其鄰人之妻者挑其長者長者言之挑其少者少者報之後其夫死而取其長者或謂之曰夫非罵爾者邪曰在人欲其報我在我欲其罵人也夫天命難知人道易守守道之臣何患死臣頃之帝以衍爲曲陽令誅斬劇賊郭勝等降五千餘人論功當封以讒毀故賞不行建武六年日食衍上書陳八事其一曰顯文德二曰褒武烈三曰修舊功四曰招俊傑五曰明好惡六曰簡法令七曰差秩祿八曰撫邊境書奏

帝將召兄初衍爲狼孟長以罪摧陷大姓令狐略是時略爲司空長史讒之於尚書令王護尚書周生豐曰衍所以求見者欲毀君也護等懼之卽共排間衍遂不得入後衛尉陰興新陽侯陰就以外戚貴顯深敬重衍衍遂與之交結由是爲諸王所聘請尊爲司隸從事帝懲西京外戚賓客故皆以法繩之大者抵死徙其餘至貶黜衍由此得罪嘗自詣獄有詔赦不問西歸故郡閉門自保不敢復與親故通建武末上疏自

陳書奏猶以前過不用衍不得志退而作賦顯
宗卽位又多短衍以文過其實遂廢於家衍娶
北地女任氏爲妻悍忌不得畜媵妾兒女常自
操井曰老竟逐之遂陷壞於時然有大志不戚
戚於賤貧居常慷慨歎曰衍少事名賢經歷顯
位懷金垂紫揭節奉使不求苟得常有凌雲之
志三公之貴千金之富不得其願不槩於懷貧
而不衰賤而不恨年雖疲曳猶庶幾名賢之風
修道德於幽冥之路以終身名爲後世法居貧

年老卒于家所著賦誄銘說問交德誥愼情書
記說自序官錄說策五十篇肅宗甚重其文
論曰夫貴者負執而驕人才士負能而遺行其
大略然也二子不其然乎馮衍之引挑妻之譬
得矣夫納妻皆知取詈已者而取士則不能何
也豈非反妬情易而恕義情難光武雖得之於
鮑永猶失之於馮衍夫然義直所以見屈於旣
往守節故以彌阻於來情嗚呼

贊曰譚非讖術衍晚委質道不相謀詭時同失

體兼上才榮微下秋

恨賦畧

梁江淹

敬通見抵罷歸田里閉關却掃塞門不仕左對
孺人右顧稚子脫畧公卿跌宕文史齋志沒地
長懷無已

自序

比馮敬通

梁劉峻

余嘗自比馮敬通而有同之者三異之者四何
則敬通雄才冠世志剛金石余雖不及之而節
亮慷慨此一同也敬通逢中興明君而終不試
用余逢命世英主亦擯斥當年此二同也敬通
有忌妻至於身操井臼余有悍室亦令家道輒
軻此三同也敬通當更始之世手握兵符躍馬
食肉余自少迄長戚戚無歡此一異也敬通有
子仲文官成名立余禍同伯道永無血胤此二

異也敬通膂力剛強老而益壯余有犬馬之疾
溘死無時此三異也敬通雖乏殘蕙焚終填溝
壑而爲名賢所慕其風流郁烈芬芳久而彌盛
余聲塵寂寞世不吾知魂魄一去將同秋草此
四異也所以力自爲序遺之好事云

集評

顯志壯而泛濫衍抑揚頓挫怨之徒也

陸機

敬通雜器準鑊戒銘

文心
雕龍

遺事

衍與田邑素誓刎頸俱受重任

東觀記